

السفر إلى الزقازيق

- قعدوني من الكتاب عشان اشتغل «تملى».
- عشر سنين وأنا واحد من غلمان ماجأ الأيتام بالزقازيق وكنت عامل راسى براس عبد الحليم حافظ.
- عدت لعزبة أبو نجم واشتغلت كلاف للبهائم.
- أول مقابلة بينى وبين القاهره.. أخذنى ليها أخويا محمد ثم طردني منها بعد ما تسببت له فى مشكله أدت إلى طرده من السكن.

obeyikan.com

بعد موت أبويها المفاجيء.. طعم الحياه مرر ولونها بهت.. والأحلام الوردية
اصفرت واسودت الدنيا في عين الست أم عبد العزيز وشالت الحمل بدرى..
وسبحان المعين.

كان المفروض إن محمد أخويا يمشى في التعليم العام ويتخرج من الجامعه عشان
يعوض فشل عبد العزيز في الدراسه وموت مديحه - العروسه.. بينما كان طريق
العبد لله حبيداً من كتاب الشيخ أبو عيطه وينتهي بعالمية الأزهر الشريف والعمه
ولقب العالم الجليل لشخصى الضعيف.

ومات أبويا ومحمد في سنه ثانيه إبتدائي في مدرسة أبو حماد وأنا في الكتاب
وكان المنطقي إن محمد أخويا يسبب الدراسه أم مصاريف وأستمر أنا في الكتاب أبو
كيله شعير.. لو المسأله مسأله فلوس يعني. أما بقا لو الحكايه رهان على الحصان سبق
فأنا لها ولا فخر.

أولاً: تدهور العلاقات والنزاع المسلح اللي كان ناشب بيني وبين الشيخ أبو
عيطه ماكانش سببه غبائي ولا تخلفي في الحفظ.. دنا كنت بامسح عشر ألواح في
اليوم بينما أجمعص عيل كان بيمسح ثلاث ألواح.. المسأله إن فيه عدم استلطاف
متبادل بيني وبين سيدنا لسبب جنونه وشطحاته إلی مالهاش أى مبرر.. وأنا متأكد
إنه بدون الشطحات دى ونوبات الاستظراف اللي كانت بتلبس جتته كان ممكن نبقى
مع بعض زى السمته ع العسل.

ثانياً: محمد أخويا كان مدبلر سنه أولى إبتدائي وعلى وشك الدبلره في سنه ثانيه
بإذن واحد أحد.. لكن اللي حصل إنهم قعدوني من الكتاب عشان أشتغل في
الغيطان تمللي وكان رأى أمي في المسأله دى إن محمد ما يقدرش على شغل الفلاحه
والبهدله.. لأنه كان وشه أحمر وعنيه زرق وشعره أصفر!

وكانت صفيه أختي اللي هي أكبر من محمد بتساعد عبد العزيز والشوادي ابن
أبويا إبراهيم وأمى زوبه في شغل الغيط.

اندمجت في حياتي الجديده وبسرعه بقيت جزء من الألعاب اللي بيمارسها الأنفار في أوقات العمل والراحه.. عشقت غنا البنات والولاد واحنا بنشتغل وعشقت لعب السيجه وخط الله معيد معيد وحراميه الدور والمكحوش وحميت بوشه وتلابطني وصيد السمك من الترع والرشاشيح وحلقات الذكر بالليل والفكه والطاقيه في اللعب اللي كنا بنلعبها في ليالى القمر.

الحاجات البسيطة دي كانت هي اللي خلقت علاقه العشق بيني وبين المكان اللي هو عزبه أبو نجم أدفا حضن ضمني وملاعب الصبا وموطن القلب والروح وبهجة النظر أوقات كنت باقول بيني وبين نفسى:

- الحمد لله إن أبويا مات وماكملتش في الكتاب وسافرت مصر أدرس في الأزهر.. ماكتتش قادر على مجرد تصور بعدى عن عزبة أبو نجم.. حتى مولد أبو مسلم اللي كانوا العيال يستعدوا له ويحوشوا له طول السنه.. عمرى مارحته.

كنت خايف أروح المولد ما ارجعش!

كنت عاشق بجنون لكل شيء في عزبتنا.. إلى أن كان ذات يوم جمعه.. تاريخ ما اعرفشى كام سمعت أمى وهى بتقول بصوت باسم:

- اسم الله ياخويا.. يا مرحباً يا حلة البركه.

شويه ودخل خالى حسين أبو سماحه.. ابن عم أمى وابن عم أبويا اللي كان بيزورنا في بيت الزقايق ويسهر عندنا ويلعب أبويا طاولة وكان أبويا بيغلبه دائماً.. المره الوحيدة اللي هو غلب فيها حصلت لى كارته.

- أنا كنت قاعد جنبه وهو بيلعب ويظهر إنه اتفاءل بوشى راح مدينى قرش صاغ مخروم حطيته تحت للخذه ونمت.. وصبحت الصبح أدورع القرش صاغ؟.. أبداً.. وصرخت صرخه أثارت الفزع فى البيت وجت أمى جرى من أوضتها وحاولت مديحه أختى تاخذنى فى حضنها رحت عاضضها فى ذراعها صرخت ورمتنى فى الأرض وأخيراً اكتشفنا إن محمد أخويا هو اللي سرق القرش صاغ بشهادة صفيه أختى وقام بدرى.. ودى مش عوايده.. ونزل ع المدرسه وكانت المدرسه فى آخر

الشارع.

ونزلت لك زى المجنون وفضلت أجرى لغايه ما وصلت المدرسه لقيت بوابتها
الحديد الكبيره مفتوحه دخلت لقيت التلاميذ واقفين طابور ومعاهم المدرسين والناظر
ويقولوا نشيد الصباح:

حفظ الله الملك

ورعى الله علاه

رينا والفضل لك

احمه وانصر حماه

أنا عجبني الغنا وقفت أغنى معاهم وأبصع الناظر.. كان راجل قصير ورجليه
مفرشحه وكان اسمه الأستاذ عبد العزيز القط وأول ما خلص النشيد رحت جارى ع
الناظر وداخل بين رجليه وجايه بسنانى من لبلوب وركه وحطيت غلى من عملة
محمد أخويا ورحت غارز سنانى فى لحمه.. الراجل صرخ بعزم مافيه:

- يالهُوتى يامه.. حوشونى يا ناس.. الحقونى يا مسلمين.

وفوجئت بريعه بشعه خارجه من مؤخرته رحت سايبه راح واقع على الأرض
مسورق وقلت له:

- إف.. جتك القرف إنت مفسى؟

الأول المدرسين قعدوا يضحكوا وبعدين اتكاتروا علىّ ومسكونى ولما عرفوا
الحكايه حبسونى أنا ومحمد أخويا فى المراحيض لغاية ما جه أبويا استلمنا وما
بطلش ضحك من لحظه ما خرجنا من باب المدرسه وراح حكى لأمى واخواتى وهو
بيضحك وادانى شلن وقعدوا يضحكوا طول النهار.



المهم.. دخل خالى حسين وبعد السلامات ودعوات أمى له بطولة العمر وشرب

القهوه.. بدأ الكلام بينهم يبقى وشوشه وبدأوا يبصولي بإشفاق ويتسموا لى بشكل ما يظمتش وفجأه ارتفع صوت خالى حسين يقول لأمى:

- خبر إيه يام عبده ياختى.. وحدى الله أمال.. ابنك فى حبة عيني من جوا هو فؤاد مش أخو عفاف؟

بصيت على أمى لقيت وشها غرقان دموع مع إنها ساكانتش بتعيط.. لكن إيه رأيك بقى عمري ما شفت وشها بالجمال ده؟

وقامت أمى وخذتنى فى حضنها ودخلت أوضتها وقلعتنى هدومي ولبستنى جلابيه العيد اللى فات والصندل اللى كان أبزيم فردته الشمال مقطوع وضايح.. وقعدت تبص لى من فوق لتحت وباستنى وقالت لى:

- اسم النبى حارسك وضامنك.. زى القمر!

وخذتنى فى حضنها وضممتنى بشده وفضلت تبكى من غير صوت ومسحت دموعها وخرجنا من الأوضه لقينا خالى حسين واقف وأول ما شافنى ضحك وقال لى:

- اسم الله على عريس بنتى اسم الله.

راحت أمى واخذتنى فى حضنها وقالت لخالى حسين:

- يا زين ما أخذت لبتتك يا أبو عفاف.

وملست على شعري بحنان وقالت:

- دا هو الراجل اللى فى ولادى.

وقالت لى:

- إنت حتسافر مع خالك حسين على مدرسة الزقازيق وفى المسامحه حتيجى فى حضن أمك هنا.

وسحبني خالى حسين من إيدى وخرجنا عشان أسافر لأول مره وأسيب عزبة أبو

نجم لوحدي.. ما عرفش إيه جرافي ساعتها.. مشيت جنب خالي حسين ساكت لا
أنا فرحان ولا حزين.. لا أنا موافق ولا رافض.. زي الدبيحه اللي رايحه المجره..
لحد ما وصلنا فم ترعه الملاك وقابلتنا نسمة العصارى شايله صوت العيال بيغنوا
وهما بيشتغلوا في غيط المدور:

أوجه بقره حاحا

أوجه النظاحه

أوجه حلبت شخيين

أوجه والباقي فين

أوجه شربه الراعي

أوجه والراعي فين

أوجه حدا ابن عمه

أوجه دا وابن عمه

أوجه ما سيّل دمه

أوجه يا دم الشوم

أوجه عدى الفيوم

أوجه فيومه خضرا

أوجه ماعدت طنطا

أوجه طنطا شراقي

أوجه فيها وز عراقى

أوجه ناكل وندبح

أوجه نرمى العضام

أوجه في سوق شاهين

أوجه شاهين ما مات

أوجه خلف بنات

أوجه وبناته تسعه

أوجه إتيهم لسعه

واحد منهم راحت تملا

رجعت جبلى

قابلها ابن السلطان

قرصه التعبان في كحكوحه

طلع روجه

يا عم ياللى قاعدع الحيط

إنت حللى ولا ضيف

أنا ضيف ومعايا سيف

باطير روس الظالمين

الظالمين الظالمين

ما قدرتش أمسك نفسى وأنا سامع العيال بيغنوا من غيرى ورحت معيط وقايل:

- آه يا حبيبتى يامه.

لقيت خالى خدنى فى حضنه وفضل يطبطب علىّ وهو يقول:

- خبر إيه يا هايف.. دانت حتروح المدرسه.. وتطلع أفندى زى أبوك عزت

وخالك حسين.. وح أجوزك عفاف بنت خالك.

يوم السبت خدنى خالى حسين الصبح وركبنا عربيه حنطور وصلنا للمدرسه

ودخلنا أوضه الناظر راجل قصير وتنخين فكرنى بالأستاذ عبد العزيز القط.. وبعد ما

خالى حسين شرب القهوه مع الناظر سابني وخرج.. وخذوني طلعتوني ع الدور الثاني قلعوني هدمي ولبسوني بنطلون شورت وقميص كاكي.. وحجزوني في الدور الثاني لحين بلوغى السن القانوني اللي يسمح لى بنزول فصول الدراسه والورش:

- كانت المدرسه دى هي ملجأ الأيتام بالزقازيق اللي بناه المحسن الكبير عبد اللطيف بك حسنين وهبه اللي كان تمثاله النصفى محطوط على قاعده رخام فى وسط الجنينه اللي فى حوش الملجأ.

من سنه ١٩٣٦ إلى سنه ١٩٤٥ وأنا واحد من غلمان ملجأ الأيتام بالزقازيق الميّه وخمسين.. عنبر ألف ستين غلام وعنبر ب ستين غلام وعنبر ج ثلاثين غلام. أول ليله قضيتها فى الملجأ كانت على سرير نمره واحد فى عنبر ألف وآخر ليله قضيتها كانت على سرير ١٤٩ فى عنبر ج.

يعنى فى خلال عشر سنين جببتها من شرقها لمغربها فى الثلاث عنابر وفى الورش بدأت بورشه الأحذيه وحققت فيها فشل باهر وخرجت منها مذموماً مدحوراً بعد ما ضربنى أحمد أفندى سعيد مدرس الورشه بقالب جزم خشب مقاس ٤٤ فى دماغى وأنا قاعد نايم جنبه.. أنا صحيت على ألم رهيب فى دماغى وسمعته بيقول:

- قوم.. إنت حتشخ جنبى.

بعد كده رحت ورشه التريزه اللي مدرستها محمد أفندى الليثى أبو كرش ضخم وفضلت فيها لغايه ما اتخرجت من الملجأ وأنا مش فاهم طظ من سبحان الله غير جملته اللي كان دائماً يقولها لى كل ما أستأذن منه أروح المراحيض.. يقول لى:

- شخ وأغسل وشك.. «ويروح ضاحك».

حاجتين كان نفسى أعملهم فى الملجأ لكن كل الظروف التجمعت وشكلت حاجز منعنى من إنى أعملهم.

الحاجه الأولى.. إنى أشترك فى فرقه الموسيقى النحاسيه اللي كان بيقودها محمد أفندى ندا.



نجم أمام بوابة ملجأ الأيتام بالزقازيق عند زيارته للملجأ عام ١٩٩٠

الحاجه الثانيه.. إني أشترك في فرقه الموسيقى الوتريه اللي كان ييقودها عازف الكمان الموهوب محمود أفندى حنفي.

يمكن محاولات كلها كانت على استحياء.. بس هو دا أنا دائماً.

وانقضوا العشر سنوات العجاف وماقدرتش أحقق حاجه من الحاجتين دول
صحيح كان عندي إحساس بالظلم وسوء الحظ.. لكن أمي علمتني من ضمن ما
علمتني إن الخيره دائماً فيما اختاره الله.. والحقيقه إن الاعتقاد ده مريح!

عشر سنوات كانت مزدمه بالأحداث العامه.. على المستوى المحلى استفتحننا
بموت الملك فواد وتنكيس العلم الأخضر أبو هلال وثلاث نجوم وبعدين تتويج الملك
فاروق ملك على مصر والسودان وبلاد السنوبه وكردفان ورفع الأعلام ونصب
الزينات والاستبشار بعهد كله رخاء وخير وبركه ومات الملك عاش الملك.. وتعليقاً
على كده أدلى الأسطى محمد الليثى بدلوه فقال:

- اللي مات كلب واللى جاي كلب ابن كلب.. إنما بقى تقول إيه.. دى بلد اللي
يجوز أمي أقول له ياعمى.

لكن الشيخ إبراهيم الدسوقي اللي كان متعين مدرس عربى فى الملجأ ومانفعض
فعينوه ظابط التعيين فى المطبخ اتهم الاسطى محمد الليثى رئيس التريزه بالكفر
والإلحاد وقال له:

- دى أفكار ثورجيه وإحنا لازم نطيع الله والرسول وأولى الأمر منا.
ورد عليه محمد الليثى بتهكم:

- والنبي تخليك إنت فى العدس والبصل يا شيخ إبراهيم.. يامصنن.

وضحك كل من فى ورشه التريزه سواء الغلمان أو الصنایعيه اللي كان الملجأ
بيشغلهم بالأجر أحياناً وقال الأسطى ميخائيل أبو قتب:

- أتارينى كل ماباشوف عم الشيخ إبراهيم باعطس.

وثار الشيخ إبراهيم الدسوقي واتهم الأسطى محمد الليثى بأنه موسكوفى
ويحوى البلشفيك فى ورشه التريزه وفوجئنا بمحمد أفندى الليثى راح هاجم ع
الشيخ إبراهيم الدسوقي وضربه بالمقص فى رقبتة راح الشيخ إبراهيم واقع فى
الأرض وشالوه ع العياده عند التمرجى محمود المدنى اللي كبس له الجرح تراب

وربطهوله بكم قميص قديم بحجه إن ما عندوش مرهم ولا شاش لأنه ما استلمش العهده.. لكن عبد الخليم أفندی شهوان مدرس الحساب اعتبر إن دی إهانه لكل المدرسين وضرب محمود المدني بالركبه فى محاشمه واتهمه بتبديد العهده وعملوا له تحقيق وشهد عليه عطيه أفندی المخزنجى وانتهى التحقيق بأنهم نقلوا محمود المدني المطبخ عند الشيخ إبراهيم الدسوقى وعينوا بداله محمد ناصر مساعد الأسطى محمد الطباخ تمرجى!

من الأحداث العالميه فى عشر سنين الملجأ قيام وانتهاء الحرب العالميه الثانيه وعلى فكره أنا كنت باشجع هتلر وكنت متبنى قضيته بحماس جنونى.. مش عارف ليه لغايه دلوقتى!.. الحاجه اللى عارفها إنى كنت باتمنى إنه ينسل لحم لنجليز زى ما اتمنت إن الكلب هول ينسل لحم كلب كارنو.. لكن الخواجه هتلر خذلتى وسلم فى فبراير سنه ١٩٤٥ ولأن الملك فاروق كان مولود يوم ٢١ فبراير سنه ١٩٢٠.. نفس اليوم اللى اتولد فيه عبد العزيز أخويا.. انتهب الشاعر صالح جودت القرصه وربط هزيمه هتلر بعيد ميلاد الملك فاروق وكتب غنوه غناها مطرب الملوك والأمراء الأستاذ محمد عبد الوهاب بتقول:

هل السلام فى مواعيدك

زاهر وجميل

بشر الدنيا بعيدك

ياحبيب النيل

وهى أعيادك بمعاد

دى كل أيامك أعياد

وهكذا شهدت العشر سنوات العجاف صعود وسقوط الرايخ الثالث فى ألمانيا الهتلريه.

ومن الأحداث اللى باعتبارها شخصيه فى العشر سنوات إياهم تشرىف محمد أخويا للملجأ بعد ما عجزت أمى عن مواصلة دفع مصاريف مدرسة أبو حماد

الابتدائية ومن الصدف العجيبه إن محمد أخويا وصل الملجأ في نفس اليوم اللي وصل فيه الغلام عبد الحلیم علی إسماعیل شبانه من قرية الحلوات مركز ههيا شرقيه واللى بقى بعد كده اسمه عبد الحلیم حافظ أهم وأذكى مطرب عربى ظهر فى العصر الحديث بعد عبد الوهاب واللى قدر هو ومجموعه من الفنانين الشبان سمير محجوب ومحمد الموجى وصلاح جاهين وكمال الطويل يخلقوا مدرسه جديده فى الطرب العربى ويفرضوا لأنفسهم مكان على خريطة الموسيقى والغناء فى عصر دولها المطربين وفى عز سطوة وجبروت الملكين أم كلثوم وعبد الوهاب!



ومن حماقاتي إنني كنت عامل راسي براس عبد الحليم اللي كان بيعزف على آلة كلارنيت في فرقة الموسيقى النحاسيه بقياده محمد أفندي ندا.. كان يوم مايات محمود أفندي حنفي نوبتشي يجيب الكمنجه ويجيب عبد الحليم وبعد عده تقاسيم ساحره يخلى عبد الحليم يغنى وبعدين يجي دوري أغنى.. كان عبد الحليم صوته مزيج من صوت أمي وصوت فيروز كان يقشعر جسمي وأنا باسمعه وكان دائماً يغنى حياتي إنت بتاعة عبد الوهاب.. وأنا كنت أغنى مادام تحب بتنكر ليه بتاعة أم كلثوم.

أنا طبعاً ما زلت مندهش من جرأتي.. إزاي أغنى مع عبد الحليم!؟

نفس الدهشه تنسحب على موقف محمود أفندي حنفي اللي كان بيعزف لي بنفس الحماس اللي بيعزف بيه لعبد الحليم.. سبحان الله يرزق الهاجع والناجع والنايم على بت ودنه.

تفضل من أحداث سنين الملجأ.. الحادثه الأخيره اللي هي سقوط عصفور الكناريا الطروب عبد الحليم شبانه من فوق الملجأ وإصابته بعدة كسور في ظهره ورجليه إضافه لكسور الركبتين اللي نتجت عن سقوط باب فوکه وهو لسه طفل بيحبي بعيداً عن حضن الأم اللي ماتت وهي بتولده بالبلهارسيا - المرض الفولكلوري للشعب المصري - لكن تشاء الأقدار العجيبه أن ينجو الفتى النحيل اليتيم من كل هذه الحوادث ويخرج من المستشفى على مصر أم الدنيا عشان يعيش في كنف أخوه المطرب إسماعيل شبانه اللي كان بيشتغل في معمل أدوية دوش ويلتحق بمعهد الموسيقى العربيه ويتخرج منه عازف على آلة الأبوا وبعدها وبالصدفه البخته يحترف الغناء تحت اسم عبد الحليم حافظ.

سنه ١٩٤٥ وكأناك يابو زيت ما غزيت.. رجعت لحضن عزبه أبو نجم بشوق وفرحه ما فكرتش في العشر سنين اللي ضاعوا من عمري أونظه في ملجأ الزقازيق.. كنت مستعد أشتغل أي حاجه عشان ما افارقش البلد.. وكانت فرحة عمري يوم

ماجت عمتي نظله أم إكرام تطلب من أمي إنني أشتغل عندهم كلاف للبهائم.. ساعتها شفت الانكسار والهزيمة في عين أمي اللي فوجئت بحماسي للفكره وموافقتي الفوريه عليها.. كان الاتفاق إنني أشتغل كلاف بهائم يعني راعي.. في البيت والغيط في مقابل إنني أكل واشرب ويجيولي جلايه زفير في الصيف وجلايه كستور في الشتا ويدوا لأمي خمسين قرش كل شهر! يابلاش.

وكانت أمتع لحظات حياتي لما كنت أروح الصبح أطلع البهائم من الزريه وأنا باغنى بصوت عالي وتصحى إكرام على صوتي وتيجى تصبح على.

أيضاً في ليالي الخميس من أول كل شهر لما كنا بنسهر مع حفله أم كلثوم وكانت دائماً تقدم في الوصله الأولى أغنيه معروفه وتخلي الأغنيه الجديده للوصله الثانيه وكنت في الاستراحه بين الوصله الثانيه والثالثه أعيد لهم الأغنيه الجديده بحذافيرها وكانت هي تيجى تقعد جنبي وأنا باغنى ودا كان كفايه على وأكثر من الكفايه كمان.

بدأت مواهبي تفتح وأنا على مشارف سن السبعناشر اتعلمت ألعب كره القدم من ولاد عمي الطلبة والموظفين أثناء وجودهم في العزبه في الأجازات.. وشويه شويه أصبحت لاعب أساسى في فريق العزبه وهداف الفريق!

في المباريات اللي كنا بتقابل فيها مجموعه من فرق داير الناحيه وخصوصاً فريق كفر أبو نجم اللي كانت المنافسه على صداره فرق داير الناحيه بتنحصر بيننا وبينه وكان أهم لاعب في فريق الكفر هو عبد الحليم أبو حمد ابن عمي.. كان لاعب موهوب جداً في كره القدم وكان بطل المدارس الثانويه على مستوى القطر في القفز بالزانه وكان لاعب بنج بنج موهوب وأنا مندهش إنه مالمعش رياضياً رغم إنه التحق بالكلية الحريه واتخرج منها ضابط في القوات المسلحه.

وفي لعبه - الباط - اللي هي الجودو الفلاحى ماكانش فيه عيل يجيبني الأرض لا من جيلي ولا من الجيل اللي أكبر.. غريب ابن أم تهامى هو فقط اللي كان بيطلع معايا دائماً - فرش حصير - يعني تعادل.. وبعد عدة محاولات قررنا أنا وهو مانلاعبش بعض تانى.

وفى صيد السمك كانوا يستبشروا بوشى.. ويستغلوا قدرتى العضليه على نزح أكبر كميّه من الميه بالجردل أو الصفيحه لتسهيل عمليه صيد السمك اللى بييقى قوى جداً فى الميه علاوه على إنى كنت باستغل قوه أعصابى وعضلاتى فى القبض على السمك الكبير والخروج بيه خارج الميه.

وفى لعبه المكحوش كانوا يختاروا لى أضعف فريق وكنا دائماً بنكسب رغم قوه أفراد الفريق المنافس.

وفى العمل كنت صوت الولاد فى أغانى العمل بعد ما حفظت كميّه كبيره من الأغانى كنت بارد بيها على أغانى البنات اللى كانت زكيه أم عبد القادر أحلا صوت يغنيها.

بحر من السعاده كنت غرقان فيه لشوشتى فى عزبة أبو نجم.. حتى ضرب عبد العزيز أخويا القاسى كنت بانسأه وبأتحمله مادام مش حيبعدنى عن البلد.

لكن الفقر واستئثار عبد العزيز أخويا بكل شىء جعل استمرار الحياه فى عزبة أبو نجم مستحيل.. صفيه تجوزت فى كفر أبو نجم.. ونجم كبر وببشتغل فى غيط أبويا إبراهيم وعبد العزيز ببشتغل كاتب أنفار فى تفتيش الملك وأنا ماقدرتش أستمر فى خدمة أبويا سليم لندالته الشديده فى التعامل معايا فانتهت علاقتنا بالمشهد التالى:

عصريه يوم خميس صيفى وأنا واقف أمام بقالة أبو عبد الله لابس الجلابيه ع اللحم ولابس فى رجلياً - كنجه سودا بتاعه مجدى ابن عمى - والجمهور واقف حوالياً وكلهم بيترجونى أشد حيلى النهارده ويفهمونى إن الآمال كلها معقوده علىّ وأنا بمنتهى الألاطه باوعدهم إننا حنكسب المباره اللى كان فاضل على بدايتها حوالى نص ساعه ودى كانت أول مباراه ألعبها ضد فريق كفر أبو نجم الرهيب اللى كان عقدتنا على مدى التلات سنوات الأخيره وقال أبو عبد الله:

- نغلبهم مره يا ولاد.

- أنا متظمن مادام فؤاد حيلعب النهارده.

وأنا طائر فى السما وباحلم بالزفه اللى حنعملها بعد الماتش والعيال شايلينى على كتافهم ويبلغوا بيا العزبه وإذا بأبويا سليم جاى شاقق طريقه بين المشجعين وقايل لى:

- إنت واقف ليه؟.. إمشى اسقى البهايم.

بلعت الإهانه وقلت له:

- لسه ساقيهم.

قال لى:

- روح اسقيهم تانى.

قلت له:

- لا مش رايح.

قال لى:

طب اقلع الجلايه اللى أنا لسه جاييهالك.

رحت مالخ الجلايه وراميهها فى وشه ووقفت عريان وبالكنجه والشراب المخطط.. راحوا العيال مسقفين وشالونى عريان على كتافهم وودونى الملعب لقيت فريقى وفريق الكفر فى انتظارى وأول ماشافونى انفجروا بالضحك وقال لهم غريب:

- هى دى الخطه الجديده اللى حنلاعبكم بيها ونغلبكو!

ورد عبد الحميد ابن عمى كابتن فريق الكفر وقال:

- أنا عندى شورت خد ألبسه.

قلت له:

- لأ.. أنا حلعب عريان.

قال لى:

- لا.. أنا خايف على روحى من الفتنة «وضحكننا».

ودى كانت نهايه علاقه العمل اللى بينى وبين أبويا سليم.





فى الفتره دى كان محمد أخويا اتخرج من الملجأ بعد ما اتعلم العزف على آله السكسفون فى فرقه الموسيقى النحاسيه واتعلم فى ورشه الطباعه وسافر على مصر اشتغل فى مطبعه مصر وفى أثناء إحدى زياراته للبلد أمى اشتكت له من سوء الحال ومن عدم وجودى فى عمل دايم فقرر إنه ياخذنى معاه مصر أم الدنيا وعلى قد ما كنت فرحان إنى ح اشوف الترمای وقصر عابدين على قد ما كنت حزين على فراق البلد.

وفى أول مقابله بينى وبين القاهره حسيت بالخوف!

دوامه رهيبه والناس جواها زى القش والتراب جواً فسية العقرت.. اشتغلت ترزى عند الأسطى أبوسريع فى التربيعة.. كان متجوز اتنين وبيافين عشان يلاحق عليهم وكان بيدبنى خمسه تعريفه فى اليوم من تمانيه صباحاً لغاية اتناشر نص الليل.. سبته واشتغلت فى مصنع غزل عند واحد خواجه فى كلوت بيه وحرصت مظاهرات سنه ١٩٤٦.. وكنت أيامها بابيع ظروف وجوابات فى الترمای واتعلمت أنط من ع الشمال وأنزل وش دى كانت فرصه قدامى عشان أشارك فى المظاهرات وأنا فى منتهى السعاده وكان ميدان التحرير اسمه ميدان الإسماعيليه وكان فيه معسكر إنجليزى مكان الجامعه العربيه وفندق هيلتون.. كانت المظاهره تبدأ من الأزهر الشريف ندخل الأول نسمع الخطب الوطنيه الملتهبه من القسس والمشايخ.. وبعدين نخرج نقبل ترمای ١٩ بتاع شارع الأزهر وتنطلق فى اتجاه العتبه الخضراء ثم شارع عبد العزيز ثم شارع الساعه ثم شارع باب اللوق ثم ميدان الإسماعيليه ونفضل نضرب لانجليز بالطوب لغاية ما بيدأوا هما يضربونا بالرصاص فنطلع نجري على سراية عابدين نشتم الملك والإنجليز والأحزاب ونروح بعد ما نتواعد على بكره فى نفس الميعاد والمكان.

- الصبح فى الأزهر.. جوا الجامع.. ماحدث يتأخريا رجاله.

ومن الهتافات الظريفه التى علق فى دماغى لوقتنا هذا:

- الجلاء بالدماء.. اليوم حرام فيه العلم.. مصر والسودان لنا وإنجلترا إن أمكننا..

ساعدونا يا عساكر.. بائع الأوطان كافر.

دى كنا نقولها لما تشوف عساكر الدرجه التانيه جاينين بالحدود والحزران التخين
والدروع.. يروح واحد قايل:

- أبو الليف وصل-

نروح قايلين على طول:

- ساعدونا يا عساكر-

والغريب فى الأمر إنهم أول ما كانوا يسمعون الهتاف ده ماكانوش يهجموا.. ومره
عسكرى سقّف لنا والظابط ضربه على قفاه فقعدنا نشتم فى الظابط لحد ما مسك
العسكرى باس على راسه وحضنه راحوا كل العساكر والمظاهره مسقفين.

ومن أطرف الحاجات اللى شفتها راجل صنايعى بيصلح بوابير الجاز شاييلته
وماسك وابور لحام مولع وبيهتف واحنا وراه:

- يا الجلاء يا الحريقه.. يا الحريقه. يا الحريقه يا الجلاء-

كنا ساكنين أنا ومحمد أخويا فى عطفه ندا فى الحسينيه فى مطرح مفروش ع
السطح وفيه دوره ميه مستقله وكانوا واخدين علينا قايمه بمحتويات مطرح اللى هى
سرير بواحد مرتبه وواحد مخده وواحد لحاف وكتبه بلدى بواحد مرتبه واثنين مسند
وواحد ملايه وواحد وابور جاز وواحد طشت غسيل وواحد زير بواحد حماله
وواحد قله بواحد غطا نحاس فى واحد صينييه نحاس وواحد براد شاي صاج بواحد
كبايه قزاز ياسين م الأصيلى وكان إيجار مطرح خمستاشر قرش تدفع بإيصال كل
أول شهر وكانت صاحبه البيت اسمها أم مُلعب وكانت ساكنه مع بنتها مُلعب فى
الدور الأرضى وكانت هى مرافقه المعلم عيد بلاص صاحب القهوه وبتتها مرافقه
بيومى الطرشجى وف ذات ليله قعدوا الأربعة سوى مع بعض وقاموا دوروا الضرب
فى بعض وكنت أنا لوحدى فى مطرح لأن محمد كان بايت بره وفوجئت بخبط
شديد ع الباب قمت أفتح لقيت مُلعب عريانه ملط أول ما فتحت الباب راحت
زقانى وداخله وقالت لى:

- إحميني لو كنت راجل.. إحميني الله يستر عرضك.. ابن الكلب عايز يقتلني.
وراحت طالعه ع السرير ومتغطيه باللحاف.. أنا الدم سخن فى دماغى وخذتني
نخوة الشراقوه.. وفوراً استحضرت سيره عنتر بن شداد وإزاي كان يحمى الحریم
حياً فى سواد عيون حبيته عبله بنت مالك وتذكرت إكرام فزعقت بعلو صوتي:
- أنا.. أنا.. أنا.. أنا.. أنا..

ولما مالقيتش كلام أقوله استلفت كلام من عنتر بن شداد فصرخت تانى:
- أنا الموت الأحمر.. أنا الأسد الغضنفر.. أنا المدعو بعتر.
وباضرب بعيني لقيت الطرشجى واقف ع الباب ولابس فائله بس وماسك فى
إيده رقبة قزازه وقال لى بصوت سكران:

- فىن الوليه؟

قلت له:

- اتفضل يا عم بيومي.

ومن حسن حظه إني كنت حاطط البراد ع الوابور قبل ما تطلع مُلعب عشان
اشرب شاي وأبص ألقى الميه بتغلى رحت جايب البراد من ع الوابور وزاعق بعلو
صوتي:


- هل من مبارز؟ هل من مناجز اليوم يوم الهزاهز.

ورحت ملبس البراد بالميه السخنه فى خلقته راح صارخ:

- عيني ضاعت.

ونزل ع السلم - يعوى زى الكلب اللى كل قالب طوب فى راس قلبه - وقبل ما
استوعب اللى حصل سمعت ضحكه مُلعب أم ديل ولقيتها رفعت طرف اللحاف
وقالت لى:

- تعالى.. تعالى هنا ف حضنى.. دانت عليك كلام ولا بتوع التياترو.



قلت لها:

- استنى بقى لما نشوف المصبيه دى حترسى على إيه.

ضحكت وقالت لى:

- إنت خايف يا أفلاحوكش؟.. ما تخافش طول ما إنت ف حضنى.. دنا مُلعب

والأجر على الله.. تعالى بقى وخليك راجل على طول.

ودى كانت أول تجربه فى حياتى.. بس يا خساره ما طولتش لأنه تانى يوم ومحمد أخويا راجع من الشغل اصطادوه عمال معمل الطرشى وجروه على جوا المعمل وفضلوا يضربوا فيه لحد ما خلوا بربوره دم وكسروا درج النقدية وشيلوهوله وزفوه لغايه نقطه الحسينيه وهناك عرض المعلم بيومى إنه يتنازل عن المحضر على شرط تعزّل من البيت.. وماكانش قدام محمد غير إنه يقبل وخرجوا من النقطه.. الحاج بيومى على معمله.. ومحمد أخويا ع البيت لقينى.. أول ما بص فى وشى قال لى:

- إنت لسه هنا يا نجس؟

أنا شفت منظره المشلف وعنيه اللى الشر بينط منها خدت السلالم أربعات وهو ورايا وكل ما إيده تطول حاجه يحدفنى بيها وفضل يطاردنى زى الكلب الجربان لغاية ميدان باب الشعريه ولما تعب وقف وقال لى بعلو صوته:

- على أمك يابن الكلب يا نجس.. وإياك تعتب هنا تانى.

أنا قلت فى عقل بالى:

- بركه يا جامع.. وملعون أبوكى يا مصر.. وأبو اللى عايز يرجع لك تانى.

واتجهت إلى شبرا البلد وأول ما رجلى طالت شط الترعه الإسماعيليه حسيت إنى طائر من الفرح.. طائر وباتمنى آخذ الطريق فى خطوه واحده عشان أرجع للحمى تانى.. وحسيت بالانتصار على كل الظروف اللى بتحاول تبعدى عن الحظن الدافى الحنين.. عزبة أبو نجم.. وطنى الحبيب الجميل.. ورجعت ماشى.



وقدرت أمى تجيب لى واسطه من أبويا عطيه أبو إبراهيم ريس الأنفار فى عريشة عشرين فى تفتيش الوادى اللى مساحته أربعه وعشرين ألف فدان ممتده من العباسه الكبيره حتى التل الكبير وكل المساحه دى بما عليها ومن عليها من زرع وضرع وبنى آدمين كانت ملك جلاله الملك فاروق الأول ملك مصر والسودان وبلاد النوبه وكردفان!

وكانت عريشة عشرين تبعد عن عزبتنا سبعة كيلومتر كنت باقطعهم يومياً رايح

جای ماشی علی رجلیا!

أول يوم استلمت شغلی رحح العريشه كتبت اسمی وقالوا لی:

- روح علی غیظ الرزح الرشاح الكبير وانزل مع الانفار نقی الرزح.

مشیت علی الرشاح الكبير فی اتجاه الأنفار ولما بقی بینی وبينهم حوالی خمسمیت
متر بدأت أسمع غناهم الجماعی وفجأه شفت بعینی صوت ساحر جای علی وش
المیه.. صوت یمامه بتغنی وهما یردوا علیها:

هی: یاجمیل لمه ودا قمحک اللی بدرته

هما: یاجمیل لمه ودا قمحک اللی بدرته

هی: یا جمیل لمه والبنت قالت لأبوها

ما اختشیت منه توب الحیا یا بابا داب

والنهد بان منه

وإن كنت عایز تصون

العرض وتلمه

ما تجوز البنت للی

عینها منه

ودا قمحک اللی بدرته

هما: یاجمیل لمه ودا قمحک اللی بدرته

مشیت ع الصوت لتعايه ما وصلت الأنفار قلت للخولی:

- أنا فؤاد أبو عزت.

قال لی:

- إتدلی التریعه مع الأنفار یابن (...).

بلعت الإهانة لأنى كنت عايز أشوف صاحبة الصوت اللي جرجرتني من العريشه
لغاية ما جابني هنا.. نزلت التريعه وبدأت أمشى مع الصف وفجأه بدأ الغنا:

ع الزراعيه

وأنا رحى أقال حببى

ع الزراعيه

وأنا خدت بختى ونصيبى

أهه.. جوز عيون بقرى فيهم الليل والنهار.. وفيهم ابتسامه حنان تطرد الغضب
وتجلب الرضا والفرح.. حسيت إنها بتقصدنى بعبارة وأنا خدت بختى ونصيبى
واتأكدت لما عادت الغنام الأول وهى بتبص لى وتبتسم الابتسامه اللي تدوب وتموت
وتحى.. كان اسمها هنومه أم اسماعين.. ولقيت نفسى باقول بأحلا صوت إداهونى
ربنا:

ساعه سعيده

سعى قدمى

وراح ليكم

إنتو الحبايب

وشرب الراح

راح ليكم

راحت هنومه مزغرطه والبناات وراها راحوا الولاد قايلين هيبه.. يدوم الحماس
يابو عزت وفجأه دب النشاط فى الأنفاس لدرجه إننا خلصنا المقطوعيه قبل معادها
بساعه وربع ودا كان معناه إنى نجحت فى الاختبار بدرجه امتياز.



طاب لى الزمان واستطاب واحلوت الأيام ولا ابتسامه متيم جاد لهاحبيب
بالوصول.. الصبح أصحى مشتاق لشقا الغيط والغنا والضهر أفرح بالتقييله تحت

ضل الشجر ولعب الباط وأخر النهار أبقى متلهف ع المروح وحضن أمى الدافى
والعشا كانت أى حله بتعملها بيبقى لها طعم جميل .. لو حتى حته جنبه قریش
بالزيت والطماطم وكانت وهى بتحط لى الأكل تحسنى برجولتى وترضى غورى
وأبقى قاعد نافش ريشى زى الديك الرومى ! وبعد العشا كنت أطير ع الرملية عشان
يكون لى شرف النداء لى كنا بنلم بيه العيال:

طق المغزل

تانى تانى

يا حلاوه

بين أسنانى

يا محلا قوله هيبه

يروحو العيال لى لسه قاعدين ع الطبالى مجاوين:

- هيبه.

وبعد ما نتلم فى الرملية أو العلوايه نحدد اللعب حسب الأحوال الجويه .. لو الليله
قمر نلعب الحكشه أو الباط أو السيجه أو كورة القدم خصوصًا إذا كان موجود حد
من الطلبة وعنده كوره كفر ثمره خمسه ولو الليله ضلمه نلعب حرامية الدور أو
الطايه فى اللعب وآه من ليالى رمضان وسحرها فى عزبه أبو نجم.

كانوا المتيسرين يسهروا مقرئين ومنشدنين طول الشهر الكريم .. وكانت عزبتنا
واحد وعشرين بيت بيسهر فيها عشره منها فى المتوسط كانوا بيخلوا العزبة زى عش
العصافير .. قبل المغرب يطلعوا ع الأسطح يقولوا التراتيل الجميله لغايه موعد الأذان
وبعدين يآدنوا وبعد الفطار يروحوا ع الجامع يصلوا المغرب والعشا والتراويح فى
مهرجان من النغم الساحر وبعدين كل واحد يروح ع البيت اللى هو سهران فيه يقرأ
لغاية قبل موعد السحور يروحوا طالعين ع الأسطح تانى وينشدوا الأدعيه والتراويل
الجميله وبعد السحور يطلعوا ع الجامع يصلوا الفجر ويروحوا يناموا ويرجعوا الجامع
فى صلاه العصر وبعد الصلاه يملوا الجامع نغم ساحر مضاف لحلاوه القرآن وجلاله

وكانت المنافسة بينهم بتكون دائماً في صالح المستمعين.

وكان فقى العمده هو عمدة الفقها عن جداره.. كان اسمه الشيخ إمام محمد طه.. وكان من بلبس.. كان منشد عظيم وكان بالإضافة إلى قراءه القرآن بيغنى الموشحات الجميله وكان بيأديها باقتدار وكان ييمسك الإيقاع بالسبحه والعصايه وكان دائماً يختار قصائد المنشد العظيم الشيخ على محمود أو بعض أغاني أم كلثوم اللي لحنها الشيخ زكريا أحمد.

الراجل ده أنا كنت باعشقه وكنت دائماً لازق له وكان هو سعيد بكده رغم صغر سنى وتفاهه شأنى.. وكان ده أول صوت موسيقى يدخل من سمعى إلى وجدانى ويشبعنى بالمتعه الروحيه اللي حددت نوع الثقافه الفنيه اللي حصلت لها بعد كده باختياري واجتهادي الشخصي.

وكان فيه الشيخ سلامه اللي كان أبويا سليم بيسهره كل رمضان وكان إلى جانب قراءة القرآن عازف عود جميل وذات ليله كان الشيخ إمام مسافر رحت سهرت مع الشيخ سلامه.. وليلتها لحسن حظي عزف الشيخ سلامه على العود وغنى موال لك يا زمان العجب.. والحقيقه إنه أبدع لدرجة إنى عملت مقارنة بينه وبين الشيخ إمام ولأنى كنت متحيز للشيخ إمام قلت لنفسي:

- لازم نطلع العود والسبحه والعصايه ونقارن بين الصوتين.

فى هذه اللحظه بدأ الشيخ سلامه يغنى شبيكى لبيكى عبد وملك إديكى.. وأنا رأيى إنها من أرق وألطف ما كتب البديع عمنا العظيم بديع خيرى:

أنا اراهن بعنياً

ومؤكد كسبانه

فى الأصل إنتى حوريه

م الجنه وهربانه

سهيتى رضوان

وفتحتى الفردوس

مين قال دول أجفان

دا التبل

ودا القوس

يا حواجبك يا عنيكى

شبيكى.. لبيكى

فيه أحلى ولا أرق من كده؟.. الله يرحمك يا عم بديع.

العيال كبرت وكبر جواها الإحساس بالظلم والتفاوت الاجتماعى اللى مالوش
أى تبرير مقنع.. وبدأ كلام أبويا على الشمروخ يتحول من نواذر تشير الضحك
والسخريه إلى دروس تثير التساؤل؟.. وبدأ عبد الجليل لاقرع.. يتحول من بطل
أسطورى خارق إلى نموذج ممكن تكراره.

وفى ذات ليله مظلمه فوجئ الجالسون أمام دكان أبوعبد الله على ضى الكلوب
بسيل من الرصاص حطم الكلوب وأثار الذعر لدرجه إن أحد الخفراء النظاميين
مسك البندقية بالقلوب وكان هيضرب نفسه.. وبعد الليله دى بدأت سلسله من
السطو على بيوت وحقول الأغنياء وأولهم سراية العمده ذات نفسه.

واضطر أبو عبد الله - أبوالبناات - إنه يحتمى بأحمد أبوهنداوى ونجم أخويا..
كل ليله يسهروا معاه يتعشوا ويحششوا وأحياناً يشربوا الروم والنبيت.

وكان بيثسيل فلومنه فى مكتب بخمس أدراج رزم مأستكه وعلى كل رزمه ورقه
مكتوب عليها قيمه المبلغ ولما كان يسحب أى مبلغ من أى رزمه ينزله ويطرحة من
أصل المبلغ ويكتب الباقي.

وفظن حماة الحمى للعملية فبقى واحد منهم يدعى إنه محصور ويقوم بفك
حصر فيدخل ع الأوضه اللى فيها المكتب ويسحب مبلغ ويطرحة ويكتب حاصل
الطرح ع الورقه ويظهر إنهم سحبوا بافترا لدرجه إن أبو عبد الله هرش فبدأ يراجع

عمليات الطرح اكتشف إن دا مش خطه يعمل إيه؟ .. إذا واجههم ما عندوش دليل ضدهم وعليه بعد كده إنه يتحمل نتيجة اتهامهم بالباطل .. وإذا سكت بيته حياخرب .. وهدهاء تفكيره إلى طريقه جهنميه تلخصت فى إنه سقاهم ذات ليله كميات مهوله من الخمره والحشيش ولما تصور إنهم فقدوا وعيهم سألهم:

- قوللى ياسى محمد إنت وسى نجم.

قالوا له:

- خير يابو عبد الله؟

قال لهم:

- هو الفار بياكل الفلوس؟

وكأنه رمى جبل النجاه فردوا فى نفس واحد:

- طبعاً.. الفار بياكل الفلوس.

قال لهم:

- آمنت بالله.. لكن الفار بيكتب؟ .. يعنى الفلوس اللي بياكلها بينزلها من أصل

المبلغ؟

ورد عليه أحمد أبو هندأوى بمنتهى الهدوء:

- أمال.. مش الفيران بنى آدمين زينا وفيهم فيران متعلمه.

وقلغ أبو عبد الله البُلغُه وقعد يضرب نفسه على دماغه لحد ما أغمى عليه.

اتغيرت الخريطه السكانيه فى البلده لعدده أسباب.

أولاً: دخول عنصر جديد على الخلطه البشريه الموجوده على أرض عزبه أبو نجم وزماداتها.. كان عنصر أوروبأوى قوامه الأسرى الألمان اللي هربوا من معسكرات الإنجليز حتى بعد نهايه الحرب واحتمال عودتهم للوطن.. والحقيقه إن العزب والكفور والبلاد المحيطة بمعسكرات الإنجليز فتحت أحضانها وقلوبها للأسرى الهريانيين واستقبلتهم بكل حب وكرم المصريين وكراهيتهم للإنجليز لدرجه إن أغلبهم

أشهر إسلامه وانجوز وعاش واندمج في حياه الريف المصرى .

كان نصيب عزيتنا من العنصر الأوروبى تلاته اتنين ألمان وواحد طليانى لتنين الألمان اللى هما بوبى وهانتز اشتغلوا فى أرض أبويا عثمان وأثبتوا إنهم فلاحين إيديهم خضرا وكانت الناس بتروح تتفرج على زراعتهم وتستعجب أما التالت اللى هو باولوا الطليانى فطلع صايح لأنه مارضيش يشتغل فى أى مكان قريب من سراية العمده ونزل عزبة التمانين اللى تبعد عن عزبتنا حوالى أربعة كيلومتر واشتغل عند واحد فلاح انجوز بنته بعد ما أشهر إسلامه وسمى نفسه محمد المهدي.. وإيه رأيك إن باولو ده طلع هو الوحيد اللى بيّفهم لأن أول خلاف حصل بين العمده وأخوه الكبير عثمان كان صحيته بوبى وهانتز والغريب إن اللى بلغ عنهم هو أبويا عثمان ذات نفسه قبل العمده ما يسبقه وجم لنجليز والبوليس المصرى خدوهم فى الحديد بعد ما ضاعت توسلاتهم للظابط المصرى فى الهوا.

ماكانوش عاوزين يرجعوا بلادهم ويقوا يعيطوا زى الأطفال واحنا واقفين نعيط على عياطهم وقال بوبى لفيصل أفندى الظابط المصرى:

- أنا موش بوبى.. أنا مهمود.. أنا موش ألمانى أنا مسلمان.

راحت بهيه أم على راقعه بالصوت راحوا كل النسوان مصوتين وراحوا الغفرا نازلين فينا ضرب بالحزبان رحنا جارين وقعدنا نضرب فيهم بالطوب راحوا راجعين جرى احتموا فى عربيه لنجليز يقوم يشاء السميع العليم إن بوبى هو اللى يتعور ودمه يسبح راح عايص إيده دم وطابعها على صندوق البوسته وبعد كده كان أحمد أبو نجم الغفير يحلف بالطلاق إنه كل ليله بيشف عفريت بوبى مطلع دماغه من صندوق البوسته ويقول:

- أنا موش بوبى.. أنا مهمود.. أنا موش ألمانى.. أنا مسلمان.



مرت الأيام هنيه بكل ما فيها من متاعب وفقر وجوع وشقا.. ليه بقى؟

لأنى كنت راضى بمجرد وجودى فى البلد.. ومادام ده اختيارى فكان لازم أتحمّل

مستوليته بمنتهى السعادة.

كان آخر مشهد مهم شفته فى البلد هو مشهد سعيد المجنون ابن خالتي منيره وهو واقف على طريق المعاهده تانى بر الحلوه ويهتف لمجموعه من سيارات اللورى التابعه للجيش المصرى محمله بالجنود والعتاد ومتجهه ناحيه الإسماعيليه:

- إلى سحق الصهيونيه أيها الأبطال.

ماهانش على أسبيه واقف ع البر التانى يهتف لوحده رحى قالى الجلابيه ومعدى الحلوه عايم وطلعت ع البر التانى وانضميت له من غير ماياخذ باله وفوجئ بى باهتف معاه وأنا واقف ملط:

- إلى سحق الصهيونيه أيها الأبطال.

بص لى وضحك وقال لى:

- تعالى جنبى هنا يا بطل.

فقربت منه وإذا بيه يرزعى قلمين طيروا الشرار من عينه وقال لى:

- إمشى البس هدومك وتعالى اهتف للأبطال.

كلت القلمين ورجعت غديت الحلوه وأول ما وصلت البر التانى زعقت عليه:

- يا سعيد يا مجنون.. والله ما أنا هاتف معاك خليك زى الكلب لوحداك.

قال لى:

- كده.. طيب وحياة أمك هانم.. لو إيدى مسكتك لأركبك العفاريت.

وساب الهتاف وقعد يضربنى بالطوب من البر التانى وأنا أرد عليه بالطوب

وأشخر له!



فوجئنا ذات عصره بحضور محمد أخويا فى أبهى صورته رأيت عليه طول عمرى.. البدله الشركسكين البيضضا والجزمه الشمواه وكانت أول مره فى حياتى

أشوف الشرايات التايلون وراشق منديل حرير أحمر في جيب الصدر.. وراح معكم
أمى مبلغ شديد الشنّ حاولت أحده لكن ما أمكنش وبعد ما هزأنى شويه قال لنا إن
ربنا فتح عليه نتيجة دعا أمه ويشتغل دلوقتى عند الانجليز ويلاعب بالفلوس لعب..
وقعد يعايرنى بخيبتى ويتنبأ لى بمستقبل مظلم نتيجة غضب أمى على.. وبعدين قال
لى:

- أنا سايب فلوس مع نينه عشان تشتري لك شويه لبس وتجينى ع العنوان الللى ح
اسيهولك ودى آخر فرصه ح اديهالك.. بس إياك تنفع بقى.

■ ■ ■